



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 3

Ram Chandra-i Nepal PM inyaksü  
17 ben meranger tir aküm

Arvind Kejriwal-ia Sisodia ama kasa  
tia ajurutsü: Manoj Tiwari



VOL. XX NO. 148 (ADOK 148) DIMAPUR KÜPTOKNÜ (SATURDAY) METSÜREMI (MARCH) 11, 2023 ₹ 5.00

## NDPP-BJP sorkari temzüng alema inyakogo: NPCC

**March 10, 2023 (TYO):** Nagaland nung NDPP-BJP sorkari metongi inyakba angudang kanga aoksar kechiyong parnoki kanga dang aritepa sorkar department balala atema Advisors shimogo, ta Nagaland Pradesh Congress Committee (NPCC)-i ashi.

"NDPP-BJP nungi MLA 37 ya Assembly telung nung Speaker mesüra Pro-tem Speaker tsüngdang MLA ama tezüngzüktep magi tashi MLAs Elect dang lir. Parnoki tezüngzüktep magi tashibo 14 buba Nagaland Legislative Assembly nung full-fledged MLAs masü" ta NPCC-i sangdong ka nung metetdaksü.

Ajisüaka, NDPP-BJP sorkari temzüng alema parnok 24 nem Advisors ama tashi agütsüogo, ta parnoki ashi.

Ano, NDPP-BJP sorkarisa

Pro-tem Speaker inyaksü atema Mhathung Yanthan shimba atema süngmanger kechiyong iba ya inyakyimalema lir. March 9, 2023 nü Mhathung Yanthan den züngsem 23 nem Advisor ama executive powers agütsü saka pai March 10, 2023 nungang Pro-tem Speaker inyaksü tezüngzüktep agi, ta NPCC-isa metetdaksü.

"Külen, NDPP-BJP sorkari Constitution of India nung Article 180 nung Clause 9(1) kübok pro-tem speaker shimba shia lir saka iba ya mali. NDPP-BJP-i yamai maparen memeteti aser metongi inyakba ya maaksü ka lir aser magizüker, anungji Nagaland Governor-i ozüng lateta aliba ama Advisor tem aser Pro-tem Speaker shimba agientsü metetdaksür" ta NPCC Working President Khriedi Theunuo-i sangdong nung ashi.

## Sivasagar district nung 'night curfew' lir

**Dimapur, March 10, 2023 (TYO):** January 25, 2023 nungi tenzüker anogo 60 atema Assam kübok Sivasagar district kübok Nagaland den arrtsüa aliba kilometer 5 telongtet nung 'night curfew' agüja lir.

Additional District Magistrate (ADM) Sivasagar, Assam-i aonung 6:00 ako nungi anepdang 6:00 ako tashi night curfew alitsü

mapang atsülangogo. Sivasagar district nung Assam /Nagaland arrtsülen ozüng alema mapa inyakba, senzüba noktangtsü atema aonung curfew agütsür ta ADM, Sivasagar-i metetdaksü.

Iba tenokdangba kübok Magistrates, Army/CRPF/Police Security personnel aser civil ketdangsurtembo madener, ta paisa ashi.

## Centre-i linük nung yimra tensa asadanger H3N2 virus ajanga nisung 2 süogo

**New Delhi, March 10, 2023 (Agencies):** India nung H3N2 Influenza virus kanga bulua putetba atema Union Health Minister Manshukh Mandaviya-i Hokolbarnü senden ka ayonga menogo.

Senden nung Union Health Ministry ajanga state aser union territory tem dang kanga dang kümdanga alitsü aser yimra tensa jungjunga reprangtsü tetuyuba agütsü.

H3N2 Influenza virus ya tanurtem aser taintemi kanga menar. Tanurtem aser ano temang nung tashidak aliba taintemi yimra kanga menar, ta ministry-i metetdaksü.

"March 9, 2023 tashi nung state balala nung laboratory ajanga nisung 3038 dak Influenza tapu balala aliba putetogo aser iba nung H3N2 dena lir. January nung nisung 1245 dak, February nung 1307 aser March 9 tashi nung nisung 486 dak putet" ta health ministry-isa ashi.

Küm shia India nung yimra ya anaben süir, ka January nungi March ita tashi aser ka züngluruwa mongpu sülen adoker. Tan March ita tatemlen tashi nung yimra samaa aotsü imlar ta health ministry-isa

metetdaksü. Külen, India nung H3N2 yimra ajanga nisung ana süogo. Karnataka aser Haryana nung nisung kaka asü aser onoki iba tensa nung tenük yokdar, ta Union health ministry-i Hokolbarnü metetdaksü.

Tesüiba ita ishika India nung yimra kanga prokshir aser yimra teimbaka H3N2 virus (Hong Kong flu) ajanga lir. Tanga yimra dang nungibo iba yimra ajanga shirangertem mozü kidang teimba anioker, ta parnoki ashi.

India nung H3N2 aser H1N1 yimratem dang puteta lir aser shirang anaprong ya Covid den mesüktepa lir, ta health ministry-isa ashi.

H3N2 aser H1N1 agi atongertemji tanen makai aketer, temang metar, asükjang moronger, tango sashitsü timtemer aser trok nungi ola ka adoker. Shirangertemisa saksü-pokshi, terok akongba aser temang ayangba timtemem ashir aser iba ya hopta ka shi aliba shiogo, ta parnoki metetdaksü.

Iba virus ya zübazüba menateper anungji Covid mapang benshiba inyakyim benshitsuä ta doctor temi ashir.

## ULBs 3-i Municipal Act yanglushitsü akhanger

**Dimapur, March 10, 2023 (TYO):** Nagaland nung Urban Local Bodies (ULBs) aseme March 10, 2023 nü Nagaland Chief Minister dang July 27, 2022 aser September 19, 2022 anogotem Nagaland Municipal Act 2001 dak sendakba shiditem züluba nenshia metetdaksüogo.

Association of Kohima Municipal Ward Panchayat (AKMWP), All Ward Union Mokochung Town (AWUMT) aser Dimapur Urban Council Chairmen Federation (DUCCF)-i Nagaland sorkar dang Nagaland Municipal Act 2001 ajanga Arrla 371 (A) dak kongshiba arlatem y a n g l u s h i t s ü / m e y i p a reprangshitsü nenshia metetdaksüogo.

Nagaland sorkari July 28, 2022 nü AKMWP, AWUMT aser DUCCF dang zülü nung "Nagaland Municipal Act 2001

nung Arrla kobaisa Arrla 371 (A) atsünga arur, iba telangzübaji nenoki tejangja tezüluba nung agüjang" ta meshiba agizük. Sorkar nungi shidi anguba sülen ULB telongjem aseme telok balala asr kin hohotem den ajurutepa shisatsü lemsatepa aruogo, ta ULBs 3-i shidi nung shia lir.

Nagaland Municipal Act 2001 kübok ali aser ki saru (tax on land and building) Section 120 (1) (a) aser iba dak sendaklokba Arlatem intoker Act ji yanglushitsü. ULB aseme yanglushidaksünüba Arlatemji; Section 120 (1) (a), Section 120 (3), Section 120 (4) & (5), Section 123 (2), Section 123 (ii), Section 125 (iv), Section 144 & 182, Section 194 (1), Section 215-220 itemji shia liasü. Item arla ajanga India temzüng kübok temeten agütsüba Article 371 (A) atsünga arur ta parnokisa

metetdaksü.

"Arrla 371 (A) atsünga aruba arlatem meyanglushi tashi telok asem telongjemi hau masütsü aser ULB election nungji shilem magütsü/agütsü memelatsü. Temeten anema terenlok arubaji nüburtemi kodanga magizüksü. Anungji, nübur taginüba angateta municipal election magidang item Arlatemji yanglushitsü metetdaksür" ta AKMWP Tir Thejao Sekhose, DUCCF tir Zasivikho Zakiesato aser AWUMT Tir Limanungsang nungeri sign asüba shiti nungji shisema lir.

ULBs aseme züluba shitiji Nagaland Chief Secretary, Commissioner & Secretary Municipal Affairs GoN, Kin Hoho/teloktem, Naga Council Dimapur President aser Joint Co-ordination Committee (JCC) Convenor nunger dangia yokogo.

## Mhathung Yanthan-i Pro-tem Speaker tezüngzüktep agiogo

**Dimapur, March 10, 2023 (TYO):** Nagaland Legislative Assembly (NLA) züngsem Mhathung Yanthan-i pro-tem speaker inyaksü atema tezüngzüktep agiogo.

Honibarnü Governor La. Ganesan ajanga Yanthan nem tezüngzüktep agidaksü. Iba sentong nung Chief Secretary,

DGP Nagaland, Home Commissioner aser tanga ketdangsurtem aden.

Constitution nung Third Schedule nung lateta aliba ama Nagaland Governor-i tawa tu Yanthan shima liasü.

Iba sülen Assembly züngsemtemi Speaker mesüra deputy Speaker mesüra Nagaland

Legislative Assembly nung Rules of Procedure ajanga shimtetba nisung tsüngdang tanüngba züngsemtemi tezüngzüktep agütsü.

Sharingain Longkumer-i 13 buba Nagaland Legislative Assembly indang Speaker menden yutsüba sülen Speaker tasen ka meshi tashi Yanthan-i NLA Speaker inyaksü.

## Nagaland cabinet nung crorepati minister 11 lir

**Guwahati, March 10, 2023 (Agencies):** Meghalaya sülen Nagaland nunga crorepati minister aika lir ta Nagaland Election Watch and Association for Democratic Reforms-i metetdaksü.

Nagaland Legislative Assembly 2023 atema Chief Minister Neiphui Rio dena minister 12 indang affidavits asadandang crorepati minister 11 aliba kuli nguogo ta ADR-i osang metetdaksü.

Nagaland Cabinet minister 12

indang rongsenji Rs 10.58 crore (average) ta bushitetogo. Rongsen teimtiba aliba minister ji Northern Angami-II (ST) constituency nungi Chief Minister Neiphui Rio lir. Pa indang rongsen Rs 46.95 crore alang lir.

Külen, rongsen tajemtiba aliba minister ji Tizit (ST) constituency nungi P. Paiwang Konyak lir. Pa indang rongsen Rs 67.84 lakh alang lir.

Nagaland cabinet minister 12 rongnung parnok 8-i educational

qualification ji 8th pass aser 12th pass tsüngda agüja lir. Minister 4-i educational qualification ji graduation ta shia lir.

Nagaland cabinet minister 12 rongnung tetsür minister ka lir aser laji Western Angami (ST) constituency nungi Salhoutuonuo Kruse lir.

Nagaland Minister tem rongnung parnok 4-i arishi küm 41 aser 50 tsüngda agüja lir aser Minister 8-i arishi küm 51 aser 80 tsüngda ta shia lir.

## Nagaland nung HSLC & HSSLC tatidang tenzüko

**Dimapur, March 10, 2023 (Agencies):** Hokolbar nungi High School Leaving Certificate (HSLC) tatidang tenzüko.

Kaketshir 24,361-i Nagaland Board of School Education (NBSE)-i ketdangsuä agiba HSLC tatidang agütsür.

Brihostibar nungi Higher Secondary School Leaving Certificate (HSSLC) tenzüko aser iba tatidang agütsür ajak agi kaketshir 16,084 lir.

Nagaland kübok district tem rongnung HSLC aser HSSLC tatidang nung kaketshir teimbaji Dimapur lir. Dimapur district nung kaketshir 4746-i HSLC aser kaketshir 4853-i HSSLC tatidang agütsür. Maneni, Shamator, Tseminyu

asr Niuland district tem nung centre kaka lir saka HSLC tatidang tajemba agütsübaji Tseminyu district lir. Iba district nung HSLC kaketshir 209 dang lir.

Külen, HSSLC tatidang agütsür kaketshir tajemtibaji Niuland district nung lir. Iba district nung HSSLC kaketshir 38 dang lir.

Longleng, Noklak, Shamator, Tseminyu aser Niuland district tem nung HSSLC tatidang atema centre kaka lir.

HSLC tatidang agütsür kaketshir (473) teimtibaji Mokochung district nung Mayangnokcha Government Higher Secondary School nung lir. Ano, HSSLC tatidang agütsür

kaketshir (492) teimtibaji Government Higher Secondary School, Wokha nung lir.

Pariksha Parv 5.0 ta ser kaketshirtem atema live streaming sessions tenzüko. Iba ya National Commission for Protection of Child Rights (NCPCR) ajanga ayongzüker aser tanurtem atema kanga tajangzük aliba maparen ka lir.

NCPCR social media account- Facebook (<https://www.facebook.com/NCPCR>) aser YouTube/Channel/NCPCR mesüra YouTube/Doordarshan national nung live streaming sessions reprangtsü akok.

Iba dak sendakba osang tejangja NCPCR website <https://ncpcr.gov.in> nung angutsü.

## Nagaland Governor & NEZCC Chairman La. Ganesha-i NEZCC semdang



**Dimapur, Metsüremi/March 10 (TYO):** Nagaland Governor aser NEZCC chairman La. Ganesha-i March 9, 2023 nü NEZCC Dimapur semdanga liasü.

Governor-i iba tesem semdangba mapang NEZCC Director Dr Prashana Gogoi-i anir officer aser staff temi North East region nung sobaliba wazüka ayutsü aser temaba jenjangi ajungkettsü asoshi

anibelem mesasai mapa inyakba atema tenüngsang agüja liasü.

North Eastern state tem nung sobaliba tabu balala aliba ya temaba jenjangi ajungketa aser wazüka ayutsü nungdak aser NEZCC ajanga iba atema bendanga agütsür inyaker, ta pai ashi.

Iba Centre ajanga tesamar aliba yimya, ken aser tsüngsang tem indang document bendena

ayutsü ajungshiba asoshia Governor-i pelaba lemsatop.

Director, NEZCC ajanga pela agizükba o jemi, Yotsu Cultural Club (Lotha), Chakhesang Zuve Cultural Club aser Tsunso Cultural Club (Yimkhiung) temi sobaliba tsüngsang agi shilem agi aser D. Vashum, Jt. Director, NEZCC ajanga melepzüng o jembia liasü.

## Industries & Commerce indang Director aser Jt. Director den tepila sentong agi

**Dimapur, Metsüremi/March 10 (TYO):** Department of Industries and Commerce indang Director, Vitsutho Nyuthe aser Jt. Director, Nchumbemo Patton asoshi tepila sentong ka March 10, 2023 nü Conference Hall, Directorate of Industries and Commerce, Kohima nung agia liasü.

Director menden nungi anisüngzksang Vitsutho-i iba sentong nung jembidang, küm ishika tsüngta Department nung tayongzükba balala ajangshiba ajanga yimya tajungba nung inogo, ta ashi.

Pai team tasenba dang tejangraba tulu nung mapa bener aotsü aser tajungtiba nung inyaksü mepishia liasü.

Department renlokba tsütsü aikati asadangsü mokoki shilem tulu agiogo aser pei asoshi meblemi nübur tenzükgoko, ta pai ashi.

Yamaji maongka jenti bener arutsüba aser nübur ajungtsü asoshi tejangraba tulu nung inyakba atema pa pelaba lemsatop.

Department asoshi imlatsüba tulutibaji ajaki teamwork nung maneni inyaksü, bendanga agütsütsü aser takok süngjang tajung tendangba asütsü, ta pai ashi.

Jt. Director menden nungi anisüngzüksang Nchumbemo Patton-ia iba sentong nung jembidang tembar tajung ka-ka akumba asoshi pelaba lemsatop aser parnok den külemi inyakba

ya konang-tetushi süa bilemer, ta ashi.

Iba Department nung inyakba ajanga tangazükba jenti nguogo aser ajaki shilem tajung agia kü takum nunga tongtipang shilem agiogo, ta pai ashi.

Kasa sentong nung Commissioner & Secretary, Kekhrievor Kevichusa, IPoS; Director, Industries and Commerce, A. Temjen Jamir; General Manager, NIDC Ltd. Temjen; General Manager, DIC, Mon, Lemnon Wangsha aser Jt. Director (Admn) & President NICGOA, Er. Lipongse Thongtsar nungtemia tepila o jembia liasü.

Iba sentong nung Addl. Director, P. Tokugha Achumi menden liasü.

## Handloom Expo nung südaker 50 dak temai shilem agir



**Kohima, Metsüremi/March 10 (TYO):** Nagaland Apex Weavers and Artisans Cooperative Federation Ltd. Dimapur (WEAFED) ajanga GPPK Hall, Chandmari, Kohima nung anogo 14 asoshi ayongzükba State Handloom Expo nung Nagaland, Assam aser Manipur nungi südaker 50 dak temai arua shilem agitar.

Hokulbarnü iba sentong tenzükbä mapang tesemdang

tongti ka ama Commissioner & Secretary Cooperation Department, Sehjang Doungel-i jembidang, südaker aser cooperative sector nung inyaker nem pei yanglutetba oset ayoktsü asoshi sapang balala agütsütsü asoshi iba expo ya ayongzük, ta ashi.

Iba State Handloom Expo ya Development Commissioner for Handlooms, Ministry of Textile, Government of India ajanga

sponsor asü, ta pai ashi.

Ministry of Textile ajanga artisan tem aser südaker ajangzüktsü asoshi region nung zünger mapa mangu aliba lanurtem nem skill training agütsüba kisüng masü saka artisan tem department nung tenüng zülüoka sorkari scheme balala kübok teyari agütsübatem agir, ta Doungel-i ashi.

## DC Kohima ajanga nüburtem dang metetdaksür

**Dimapur, Metsüremi/March 10 (TYO):** Deputy Commissioner & Chairman DDMA Kohima, Shanavas C IAS ajanga sangdong ka nung ashiba agi, February 27, 2023 nü Mao Market aser MM Market nung kitsük-kirong lendong atalokba mechi Disaster Management Act, 2005; Section 34, clause (c) kübok ashi agüja aliba ama

Mao Market aser MM Market/ building ya nisung alitsü asoshi majung ta nübur ajanga dang sangdonger.

Nisung kari danga iba sangdong nung aibelenba putetra, Disaster Management Act, 2005, Section 51, Clause (b) agi melaba ama merenshitsu aser iba totuyuba ya tang nungi tenzüka amshitsü, ta sangdong ajangasa ashi.

## Arms License alirtem dang metetdaksür

**Dimapur, Metsüremi/March 10 (TYO):** Deputy Commissioner, Kohima, Shanavas C IAS ajanga Kohima District kübok Arms License alir ajunga dang sangdong ka nung ashiba agi, 14th Nagaland Legislative Assembly Election 2023 mechi

pei anasa aliba Police Station nung license aliba prangbong agüja alirtemi pei prangbong meshitsü akok.

License aliba prangbong tem ya Police Station nungi March 10, 2023 nü nungi tenzüka meshitetsü, ta sangdong ajanga ashi.

## Chief Information Commissioner-i Governor ajuru



**Dimapur, Metsüremi/March 10 (TYO):** Chief Information Commissioner, Nagaland, I. Meyionen Jamir den State Information Commissioners, Nosazol Charles aser T. Kekongchim Yimkhiung nungeri March 10, 2023 nü Raj Bhavan, Kohima nung Nagaland Governor La. Ganesha ajuru liasü.

Iba mapang Commissioner temi Governor den tepela lemsatop aser Commission indang inyakyim aser yimya

lemsatapa liasü aser state nung RTI Act mapa kuma inyakba indang shia liasü.

Osangtsüsang bushirtem aser Public Authorities temi RTI Act mashi lenmang nung amshiba indang parnoki jemi.

Iba Act tashi itshitsü asoshi Governor-ia state aser Centre nung yariteptsü molunga aliba lemsatapa liasü. Kasa mapang Commission ajanga timtem ajuruba indanga Governor den lemsatapa liasü.

## March 14 nü Workshop-cum-Technology Innovator Meet alitsü

**Dimapur, Metsüremi/March 10 (TYO):** SDGCC, Department of Planning & Coordination ajanga Atal Incubation Centre (AIC) SELCO Foundation den lungiemer Hotel Vivor, Kohima nung State Level Workshop-cum-Technology Innovator Meet ka March 14, 2023 anepdang 9:00 ako nungi ayongzüktsü, ta sangdong ka ajanga ashi.

Technology Innovators nem pei sasa bushitetba tem shishilempaba tsütsü maongka ama sapang agütsütsü nükjidong nung iba workshop ya ayongzük, ta ashi.

Iba workshop nung sensaksemba, panel discussion, expert sessions, network building, partnership building aser AIC SELCO Foundation's Incubation Programme nung tenüng zülüokba alitsü, ta sangdong ajangasa ashi.

## AR-i Chilliso Village Council nem computer aser solar lights agütsü

**Dimapur, Metsüremi/March 10 (TYO):** HQ IGAR (North) kübok Assam Rifles, Shamator Battalion ajanga March 9, 2023 nü Noklak district kübok Chilliso Village Council nem computer den printer aser Solar Lights tem lema agüja liasü.

Iba maparen ya nüburtemi

pelashishia agizüka liasü, koba ajanga Chilliso Students' Union, village council aser Chilliso Women Council indang document tem digital nung amshitsü asoshi lenmang lapoktsütsü aser iba yimtsüng nung aliba kaketshir nem Computer inyakyim sayuba nunga yaritsü.

## Australia nung Hindu nunger tekülem ki raksatsüba atema sasar: PM Modi



March 10, 2023 nü Rashtrapati Bhavan, New Delhi nung Australia Ato kilonser, Anthony Albanese-i osangbenertem den jembidang tangokba noksa nung angur. Kasa noksa nung India Ato kilonser, Narendra Modi-a angur.

**New Delhi, Metsüremi/ March 10 (Agencies):** Hokolbarnü Ato kilonser, Narendra Modi-i Australia Ato kilonser, Anthony Albanese den tawa Australia nung Hindu nunger tekülem kitem raksatsüba tebilemtsü onük lemsatepogo.

Lenir anati linük ana tsüingda lenla balala nung tesendaktep tajungba akümtsü atema jembiba mapang nung Modi-i Australia nung tekülem kitem raksatsüba onük süoka liasü.

Lenir anati osangbenertem den külemi jembidang Modi-i, tesüiba hopta ishika tsüingda Australia nung tekülem kitem raksatsüba osang angashia sasar; atangji item ama osang ajanga India nunga ajaki tebilemtsü akar, ta metetdaksü.

"Ni Ato kilonser Albanese den iba tebilemtsü onük lemsatep aser pai kü dang par linük nung India nunger kümzüksü atema pai tongti süa inyaksü ta shiogo," ta Modi-isa metetdaksü.

"Iba tebilemtsü atema telok anati maneni tongtepratepa alitsü aser akokba tashi amalitepa inyaksü," ta paisa shisem.

Taküm January ita nung hopta ana tsüingda Australia kübok Victoria state nung Hindu nunger tekülem ki asem raksaja liasü. India nunger anema noksa tepsatsüba aser tekülem kitem amakba ya Kalistani pusemertemi asütsüa akok ta bilemer.

January 12 nü Melbourne kübok Mill Park area nung

Swaminarayan tekülem ki raksatsü aser tekülem ki temeket wara nung India nunger anema o balala zülusaja liasü.

Iba tatalokba sülen anogo pezü lir Carrum Downs, Victoria nunga Shri Shiva Vishnu tekülem ki raksatsü aser Hindu nunger anema noksa yanglusatsür liasü. Iba tatalokba sülen January 23 nü Albert Park, Melbourne nung ISKCON tekülem ki raksatsü aser India anema 'Khalistan Zindabad' aser 'Hindustan Murdabad' ta zülusatsür liasü.

Canberra nung Indian high commission-i item tatalokba aitsüba den külemi Australia sorkar den-a iba tebilemtsü aiben lemsatepogo.

Modi-isa, pai Australia Ato kilonser den Indo-Pacific nung amalitep atema o lemtepogo aser security atema linük anati amalitepa inyaksü jembiego, ta metetdaksü.

Ato kilonser Modi-isa, linük anapronglai 'comprehensive economic agreement' atema jembidar aser defence sector nunga tesüiba küm ishika tsüingda linük anati tezüngzüktep aika agiogo, item rongnung linük ana sepaitemi amalitepa inyaksü densema lir, ta metetdaksü.

Albanese-i, Modi tenati India - Australia Comprehensive Economic Cooperation Agreement tekara nung tembangtsü atema jembiego, ta metetdaksü.

## Bihar nung nashi shi shibelener südi ta melung melemi nisung ka tepset

**New Delhi, March 10 (Agencies):** Bihar state kübok Saran district nung arrshi küm 56 tambur kati nashi shi shibelener, ta melung melemi loktii tepset, ta police-i metetdaksü.

Naseem Quereshi tepsetba ken o nung Hokolbar tashi nung police-i nisung asem pua lir, ta police-isa metetdaksü.

Police-i tang pua alirtem rongnung sarpanch, Sushil Singh aser yimdaklir ana- Ravi

Sah aser Ujjwal Sharma nunger densema lir.

Ajisüaka nisungba ket nungji nashi shi bena liasü asü maliasüar police-i metetdaksü.

Asür, Naseem Quereshi ya Siwan district kübok Hasanpur yimdak nungi liasü.

Mongolbarnü Naseem aser par aianu chir, Firoz Qureshi na par kinüngertem ajurui Saran district kübok Jogia yimdaki aoba mapang nung

loktti kati Jogia yimdak tena soita liasü.

Tena yangkhu nung nashi shi bena lir, ta parnoki melung melemi liasü.

"Firoz bo jena otet saka Naseem bo jena mouteti lokti jagi pa dak kanga mejungi azükba sülen police ket nung agütsü. Iba sülen pa hospital-i anir ao saka meküzmükteti asü," ta Saran district nung Superintendent of Police (SP), Gaurav Mangla-i metetdaksü.



March 10, 2023 nü Jantar Mantar, New Delhi nung Bharat Rashtra Samithi MLC, K. Kavitha leniba nung tetsürtemi Women's Reservation Bill takhangba agüja longkak aйдang tangokba noksa nung angur.

## Sorkari agency tem yimtenren hadir ama amshir: Sitaram Yechury

**New Delhi, March 10 (Agencies):** Hokolbarnü Bharat Rashtra Samithi (BRS) lenir, K. Kavitha leniba nung Jantar Mantar nung anogo piyong lumia longkak aitba mapang nung osangbenertem den jembidang Communist Party of India (Marxist) (CPI-M) General Secretary, Sitaram Yechury-i, Centre sorkari sorkar agency balala yimtenren hadir ama amshir aser linük temzüng kübok inyakyim alema inyaker, ta aitsü.

Yechury-isa opposition party ajak dang Women's Reservation Bill agizüksü atema Ato kilonser, Narendra Modi rongshitsüla, kechiyong küm 9 tejaklen pai ibaji

nangzüka liasü saka tang tashi iba Bill ya Lok Sabha nung anendaka lir, ta ashi.

CPI-M leniri, Centre-i sorkar agencies tim masüba nung amshia opposition party balala nungi lenirtem amokmerener, ta aitsü.

Paisa, Enforcement Directorate (ED) matsüngdangi jaokba lenir ajaki bushisüngdangba nung amaliteper aser tasüngdangba ajak langzür, ta ashi.

Longkak aitba tesem nung adenshiba lenir ajak ya opposition lenirtem longjemtsü atema masü saka Women's Reservation Bill pusemtsü atema adenshi, ta osangbenertemi metettsüla, ta paisa metetdaksü.



March 10, 2023 nü New Delhi nung Union Minister of Commerce & Industry, Piyush Goyal aser US Commerce Secretary, Gina Raimondo na leniba nung ketdangsertem India-US Commercial Dialogue senden amendang tangokba noksa nung angur.

## Arvind Kejriwal-ia Sisodia ama kasa tia ajurutsü: Manoj Tiwari

**New Delhi, March 10 (Agencies):** Delhi excise policy ochimashi ken o dak sendakba nung Enforcement Directorate aser Central Bureau of Investigation-i AAP lenir aser taoba mapang Delhi Deputy Chief Minister, Manish Sisodia apuba dak sendakba nung BJP MP, Manoj Tiwari-i, Delhi Chief Minister, Arvind Kejriwal-ia kasa tiaji ajurutsü, ta ashi.

Tiwari-i, "Delhi Chief Minister Arvind Kejriwal-ia tang jail nung aliba minister ana- Sisodia aser Satyendar Jain nati ajuruba ama kasa tiaji ajurutsü. Nai meimchir ashioktsütettsü akok saka nai Tsüngrembo mashioktsütettsü. Delhi senpong nungi ayaba apibo özüng alema inyaker aser ochimashir shingaia mejenbutettsü," ta ashi.

Central Bureau of Investigation aser Enforcement Directorate (ED)-i Sisodia apuba sülen Tihar Jail nung pa dang mapang talangka asüngdangyaa liasü.

February 26 nü CBI-i Sisodia apu aser March 6 tashi judicial ket nung agütsü.

Hokolbarnü court kati Manish Sisodia anogo tenet nü atema Enforcement Directorate ket nung

agütsüogo. ED-i anogo ter nü asüngdangyatsü atema court dang mepishia liasü saka anogo tenet nü atema dang agütsü.

CBI ken o dak sendakba nung Sisodia-i agütsüba bail temepishiba ken o Hokolbarnü angadangtsü liasü saka March 21 tashi atsülangogo.

Hokolbarnü court nung ken o angadangba mapang nung Sisodia atema lawyer-i, "Delhi liquor policy file ya (taoba) Lieutenant Governor dangi-a yoka liasü aser pai agizük, anungji ED-i Lieutenant Governor danga asüngdangyatsüla," ta ashi.

Delhi excise policy ken o dak sendakba nungsa Brihostibarnü ED-i Telangana Chief Minister K Chandrashekar Rao'er jala aser Bharatiya Rashtriya Samiti (BRS) MLC, K Kavitha jaoka asüngdangyadar.

Delhi excise policy senotsü ochimashi nung lai-a shilem agia lir, ta tai tonglokja lir.

National Capital Territory of Delhi (GNCTD) nung excise policy ken o nung tang tashi nung CBI-i tesem 200 jungnüa mita oa bushisüngdangogo. Delhi Lieutenant Governor, VK Saxena-i ken o agütsüba nung ajemdaker CBI-i FIR benoka liasü.



# TIR YIMYIM YIMOBILEM (EDITORIAL)

DIMAPUR KÜPTOKNÜ, METSÜREMI (MARCH) 11, 2022

## Akhüm ayokertem

**T**angarbo akok tashi timtem arema meraketa alitsü meranger saka asenokbo senyong asenok akhüm ayoker, anungji mera maket akümer. Asenoki teti election mapang asen vote mayoktsü indang jembir saka election tonga arudangbo, talisa, asenok Aor agi Aor memesük aser asenok arogo nunger agi arogo nunger memesük kenyongi balaka kümer alir. Aji oda, arogo tenzükertemiang sen agi vote aliba mapatem nokdangtsü melen, tesem kar nungbo, arogo tenzükertemiang sen agi vote yima jajaba aser arogo tenzük karibo candidate dang gari dena meshiba otsü lir. Aji oda, tang election agir anogo ishika tsüngda ya election mapang tesem tesem nung ataloba otsütem angashidang, candidate dang karibo pei vote atema sen lakh junga meshiba otsü angashir. Ashiko, asenok constituency ajak nung kibong kar dak alaka kibong shiai pei vote tsüda candidate dang kari sen meyirijang ter, kari metsü aser ano karibo tenem aser karibo lakh dak tali ta meshia chitsür alitsü. Item sen jagi nisung aika smart phone alir alitsüa akok, ano karibo ki oser kar alir alitsüa akok, ano karbo süoshianga alir alitsüa akok. Ano kar nembo motor bike aser gari tashi agütsür alitsüa akok. Ajisüaka, item osettem den asenok mera aser asenok akhüm medemdangra asenoki sen meyirijang ishikati kecha rongsen agia malizüktetba asen taküm aser kibong aser asen kin mera aser akhüm yokadokogo ta bilemdi. Asenoki election mapang vote ayoker amai bilemer saka vote masü asenok akhüm ayoker ta bilemdi. Aji oda, election nung tokteper tema pei tangatetba, tejangraba aser nükjidong nübortem den lemsatapa tokteptsü melen, sen agi MLA menden alitsü agi. Aji oda, pei kija rongsen agibo MLA menden alitsüji makoker asünungji, ano tangar rongsen dena enoksemer külenang alitsü meranger. Item tatalokbaji kodang bilemdangdir, asen lima nungbo MLA akümtsü vote agi tokteper masü saka sen teimba agi alitsü toktepa mapa ka kumogo. Iba jagi balaka, MLA shinga opposition nung melinür, kechiyong nübortem anepalutsü asoshi masü saka election mapang vote aliba sentsüh aotsü asoshi sen bushitsüla aser iba sentsühji ayangba kisung sen agibo maotetsü saka Delhi nungi nübortem asoshi yokba sen mapa meinyaki telong junga agizüka agitet nung dang aotetsü. Aji oda, joko India nung adokba osangkakettem nung dena linük nung ochimashi mapa sademsadema inyaksüsa mezüng inyaktetba state Nagaland kumogo ta tiluja noksa yanglur adokba angur. Ibaji alima nung asenoki aaba maksü mapa ka asütsü. Aji oda, India len senzüdang Naga nungertemji vote ayokertem aser assembly nunga opposition nung amentsü maremertem aser sademsadema ayatsü akokba state nungi arurtem ta India nunger tenük agi reprangtsü aser parnok bang agi jembitsü. Ibaji asen taküm, asen kibong aser asen lima nungi tenzükba maksü mapatem lir. Iba jagi Kohima nunga asenok akhüm samaogo. Yimten aser loktiliba nung sen agi masü saka aküm agidang mapang inyaker. Aji oda, tangari asenok akhümtsübu mulung lemtetra mapa tulu lezmüksütsü saka temulung melemtetra kecha melemzüksütsü. Tanü Nagaland nung government tasen kümer mapatem (portfolios) alemba jenjang jagi tangari asen kin akhümtsübu amshir asü masü, aji sayur. Nübobo asenok teimba saka asenok Chief minister akümtsübajibo yutsür Deputy Chief minister ana tashi akümyonga, iba mendenji asenok dak malang kumogo. Ibaji dang masü saka tongtibang mapatem Finance, Home aser Planning mapatembo Aori makoktsüla mapa amai kumadokogo. Item tatalokbatem ya kodang bilemdangdir, itemji tangari asenok dak tenük meremba agi masü aser maginüba agia masü saka asenok dak akhüm samaba agi tangari asenok mera maket repringba tamaitü lir. Atangji, kodaser mera maket kin nungi Chief minister kumtetsü ? Kodaser akhüm ajak yokadoker anarongdena Kohima atonger kin nem Deputy Chief minister menden agütsütsü ? Kodaser pei kibong aser yimkong senyong ayokertem kin dak temulung lema mapa tulu lezmüksütsü ? Asenokbo tangari yimdong nung mitai prokdang raktepa ashiba shisatsü aser kolok nung dang lir , anungji tangaria yamaji amshir. Tzünglua arung, anüa puang, mezüng Tsüngrem taochi agi agizükertem, Aor Khristan purtembo mapa ajak nung indangidanga meraketa alitsü melen asenoki asenoksasa bazaar oset akümba agi, tangar takari asenok alir aser parnok yunüdak ayur. Ibayongji, tanü Nagaland nung yimten khuret, maongka aser temoatsü ajak asen meyong ser asenoki tangar nem lema agütsütsü melen asenokbo kima tangari mitai prokba raktepa ashitsü atar tanurtemang mesüka kumogo. Iba maksü jeenjang nung ya asenok melinüra asenoki asen akhüm (vote) mayoktsüla aser asenoksasa asenok timtema arema meraketa alitsü merangtsüla.

# OLEMSABANG

## IBA LIMA NUNG TAJUNG O TAMAJUNG NA MEDEMDANGA YAMAI ATALOKYONGA AOKA ANGUR

-R.Imkong Lkr, Aolijen Mepu, C.T.C, Mokochung

(Yashi adok nungi...)


Tekümdangtsü O ka shiner

Meteta alitsü atema olen ka shisemner, lokti ka nung asaya menütepba nung teti agi temenen dena alir, yimya agi asaya menütepa aser menu shishiba ya yiar aser sowar mapa ama ka lir. Shibai asayar pa mesüra la denji teti agi temenen densema alir, iba jagi ka khen lutsütsü mesüra ka khen metentsütsü aser iba nungji shingaia tai temeden mepushir. Aser asaya menütepa nung tajangzük anguba kangabo mali ta asenok ajakaia metet. Saka kasa mapang nungji karibo asaya menütep teyalong nung ain adoka nisunga tepseter ya kechiba?

- |  |   |
|--|---|
| 10. Nisungtem rongnung karbo temetetba kecha maliba ajanga 'Hajera Walla' anogoshia merang mapa inyakerang chiyonga tanurtem mesüa alir, aji oda pai ochishia inyakba ajanga par kibong nungi tanurtem tajung aika adoker, yamaji item amala kibong nungi minister aser MLA tashia adoker.   | 10. Saka kar kibong nungibo ochi mashiba rongsen agi tanurtem tajung aika mesüteta takar akümer, saka tanurtem rongnungi tashi temetet ka tanga madoker, kechiba ta süra tsüraburtemi ochi mashi rongsen agi takar akümer. Karibo mozümora ayoker aser temesepa yi ayokba ajanga par rongsen züiner. Saka item amala kibongji atakatem agi tembanger.   |
| 11. Iba lima nung Politician aika lir, saka kari dang nübortem meimer aser pa mapang nung nübortem atema mapa tajung karbosa inyakteta doktsür. Iba jagi pa sür külena nübortem pa mamateter   | 11. Saka asen nübortem rongnung politician karibo pei ajungtsü pei agitsü dang bilemer ashi, nübortembo kanga junga ashioktseter. Item amala politiciantemjibo parnok süadoker külena nübortem atakatemer.  |
| 12. Iba lima nung independent (nūjiso) bushiba teloktem aikasa lir, parnok rongnung karibo Tsüngrem akhüm tsübu ochi nung pei nübortem meima timtem jenti arema oda pei taküm lalutsüa metsübu dang tatem tashi shirnoki nokdakteter, item purtem jagi dang tatem nung takok korang tulu angutsü aser Tsüngremia parnok amalaji yarir. | 12. Saka nūjiso bushirtem rongnung karibo pei ajangzüksü atema dang inyakba angur, saka parnok denji Tsüngrem teyari madener asünungji itempurtem jagi kecha nunga takok menguteter aser tatem metongteter. Aji oda parnoki merangbaji tazüngla nung dang tembanger.  |
| 13. Nisungtem rongnung karibo pei nübortem kanga akhüm tsübu alir aser pei dang nungibo pi-ang taoba ta taküm tatsüka alidang ajak den akok tashi jungtepa alitsü merangba angur. Iba jagi Tsüngremi parnok nem arishi talang den temoatsü jenti agütsür.  | 13. Saka iba lima nung tatsüka liyonga aodang karibo pei taküm dang junga lirbo, oda tangar taküm agitsüa metsübu kar angur. Item amala nisungtemji Tsüngremi alima nung talangkabo arishia medoktsür, saka tatem nung parnok takümtemji aiatai tia nung tembanger.   |
| 14. Iba lima nung aikati takar akümtsü meranger, yimya agi takartemi tangar nungi akhümtsübu aser tetushi tulu angur. Kechiba ta süra parnok dak alima temo ajak keta lir, aser parnok alima nung ali tashi jangratema tasoshia lir, parnokji koda jangratemsü takümtem lir.   | 14. Saka temeshi lai nung shia aliba ama takar nisungi kodanga kotak yimli aitsü makok. Mathi 19: 23. Aser ano A.Shin nungjia ashir, takar akümtsü temerang, aji nokdangtsüsa na shisa kaang ta shia angur. Kechiba ta süra nisung ka kodang takar kumdir asüküm shisatsü adoker aser pa takümji kodaki aotsübajibo doktsür taküm aser Tanela anapronglaji molumi kanglai alutsü sentsütsüa lir.  |
| 15. Asen taküm ya alima nung liyonga aodang mapang ka nungbo lokdi kar nungbo densemdang asaya menüteper, idangji karibo tapi agi laishiba nung shia aliba otem amshia asaya menüteper. Yamaji asayatepdang asen Teyanglur Tsüngrem jashidaktsür aser pei taküm aser kibong nung timtem tulu ajurutsüsa akümer ta metetdi.             | 15. Nisungtem rongnung kari lokdi nung asaya menütepdang kari ashir, iba tambusang tu asüdang pa tepu (teeth) ka danga maket sür asü nung pa tanaben shia arudang koda ser tepu shiteptetsü? Ta asayateper. Aser ano pa taküm alidang teka anatsülen maket ser asü nung pa tanaben shia arur külen kodaser pa teko (chest) nung atsüngtsü ta kah asayar, aser ano pa taküm alidang tetsüng tatsük ser asü nung kodaser pa tanaben shia arur külen Mesü ama pongtentsü ta asaya menüteper. Saka Isaia tapu 35: 6 nungji Tsüngremi ashibaji matalokiang malitsü ta metetdi. |

(Maneni asung adok nung...)

## Germany nung Jehovah Witnesses Hall ka nung nisung 7 khaset



March 9, 2023 aonung Germany kübok Hamburg yimti nung aliba Jehovah's Witnesses indang hall ka nung lendong atalokba sülen iba hall kima police adenshia aliba noksa nung angur. Nisung kati injang khaloktsüba mapang nisung tenet khaset.

**Hamburg (Germany), March 10 (Agencies):** Germany kübok Hamburg yimti nung aliba Jehovah's Witnesses indang hall ka nung nisung kati nisung tenet khaset aser aika yirutsüogo, ta Hokolbarnü police-i metetdaksü.

Brihostibar aonung injang khaloktsüba kechi kuli ajangaar metetet.

Jehovah's Witnesses ya Aso 19buba nung United States nung tenzüka International Church lir aser parnok indang headquarters ji Warwick, New York nung lir.

Taoba mapang Hamburg mayor aser Chancellor Olaf Scholz-i iba tatalokba aitsüogo.

Police-i ashiba agi, injang khaloktsüsangji-a hall nungji sür lia angu; pai pasasa khaset südi ta bilemer. Pa densemabo iba lendong nung nisung ti asü.

Hokolbarnep nungi forensic tsütsü mongintemi bushisingdang tenzüko.

US nung Jehovah's Witnesses otongdar, David Semonian-i sangdong ka ajanga, iba tatalokba nung asürtem atema alima tesem ajaklen Jehovah's Witnesses nung züngsemtemi mangyimer, ta metetdaksü.

Police otongdar, Holger Vehren-i, aonung 9:15 ako meta injang amshia amakba osang police nem metetdaksüba sülen

police iba tesemji tonga aodang nisung aika injang agi yirur atem nung ondaka liasü, ta metetdaksü.

Iba building azüklen injang ola angashiba sülen police-i nisung ka injang agi kanga mejungi yirur angu, aser tangar dak injang khaloktsüsang pa asütsüa akok ta bilemer.

Jehovah's Witnesses-i ashiba agi, tang alima nung parnok züngsem million 8.7 shi lir aser Germany kija nunga züngsem 170,000 shi lir.

Jehovah's Witnesses nung züngsemtemi kibok sema oa Khrista osangtajung proker aser lokti aliba tesemtem nung Khristan kaket lema agütsür.

## Pakistan nung Khristan yimsü indang school textbook adoktsü melar

**Amritsar, March 10 (Agencies):** Joko Pakistan nung Sikh aser Khristan kaketshirtemi school curriculum nung pepei yimsü dak sendakba subject agitettsü, kechiyong Pakistan nung Ministry of Federal Education & Professional Training-i Sikhism aser Christianity indang textbooks adoktsü temelaba agütsüogo.

Tawa National Curriculum Council Secretariat-i sangdong ka ajanga Sikhism indang textbooks ji class I nungi class III nung azüngertem atema adoktsü aser Khristan yimsü

indang textbooks ji class I nungi class 5 nung azüngertem atema adoktsü melaba metetdaksü.

Yimsü dak sendakba textbooks ji National Book Foundation-i Urdu oshi nung adoktsü, ta Pakistan Minorities Teachers Association (PMTA) nung chairman, Anjum James Paul-i metetdaksü.

Samundari, Faisalabad nung aliba Government Post Graduate College nung professor, Anjum James Paul-i, "2005 kum August ita 28 nü ni PMTA tenzüka liasü, aser iba mapang nungjagi onoki Pakistan nung nütsüng ajema aliba yimsü

tenet- Sikhs, Hindus, Christians, Parsees, Buddhists, Bahais aser Kalash nem yimsü tsütsü shisaliok temeden agütsütsü atema inyaka aruogo," ta metetdaksü.

"Tamalenbo minority yimsü amanger kaketshirtemi Islam yimsü indang dang zünga liasü, ajisiüka onoki meranga inyakba ajanga minority students asoshi 'ikhlaqiat' züngdaksü. Joko April ita nungibo sorkar aser nija school ajak nung Sikh aser Khristantemi pei chirnurtem Sikh aser Khristan yimsü indang züngdaksütettsü," ta Paul-i metetdaksü.

## Pope-i Yirusalem meimtsü aser yimjung atema inyaksü ayongzük

**March 10, 2023:** Pope Francis-i Yirusalem yimti nung yimsü balala amangertem dang iba yimti meimtsü aser iba yimti nung yimjung atema inyaksü ayongzük.

Yihuda nung, Khristantem aser Muslim nungertemi Jerusalem ya chichiba temeshi yimti, ta agizükra ajaki iba yimti ya yimjung aliba yimti ka südaksütsü, ta pai ashi.

March 9 nü Joint Working Group for Dialogue nung züngsemtem den jembidang Pope Francis-i,

"Tsüngremi Jerusalem meimba ama asenokia meimtsüla," ta ayongzük.

Joint Working Group for

Dialogue ya 2017 kum Palestinian Commission for Interreligious Dialogue aser Vatican Dicastery for Interreligious Dialogue nati tenteta liasü.

Taküm kum atema iba teloki Yirusalem nung tanela temaitsü atema rangloker inyaksü asoshi telemtetba agia liasü.

Apostolic Palace nung jembidang Pope Francis-i, "2019 kum ni ayongzükba ama, Tsüngrem ka dang lir ta amangba yimsü asem (Yihuda nung, Khristantem aser Muslim) amangertemi iba tesem ya nisung ajak tesünep nung aliba yimti ka südaksütsüla," ta ayongzük.

Muslim nung, Khristantem aser Yihuda nungertemi iba yimti ano taliba meimtsüla, ta pai ashi.

Pope Francis-i, "Yisu Khrista akümüli mapang nung iba yimti nung tongtibang tatalokba aika liasü. Pa tanur asüba mapang tekülem kidangi anir ao aser Par tsüraburtem den külemi kum shia kümetetba benjung nung adentsü atema Yirusalem-i ao. Temeshi yimti nung Yisu-i sayutsüngi aser sayatena mapa aika inyaka liasü," ta ashi.

Tongtibangtibaji Yirusalem nung Yisu Khristai alima nung Pa wadang tembanga tou-ashi, asü aser tasü nungi shia aru, ta Pope-i ashi.

## ANO GO ABEN TSÜNGREM DEN

## ASÜKÜM CHUBA HEZEKIA

"Pai ashi, " Parnoki ne kidang keha angu? Hezekia langzü, "Kü kidang aliba ajak parnok ni parnok dang kü rongsen mesayuba kecha maka."

- 2 Chubatem 20:15

2 Chubatem 20 nung Chuba Hezekia kanga shiranga aliba, pai Tsüngrem dang apudaka sarasadem nung Tsüngremi pa nem taneptsü agütsü aser tsükchir ket nungia kümzük. Saka, 2 Chubatem 20:12ff nungji, Chuba Hezekiai par tsükchir dang, par akaba rongsen ajak salaa sayu. Iba mapa ya chiba Hezekia asoshi asüküm mapa ka liasü. Atangji, Tsüngrem kanga jashi. Mapang tatsü ka tsüngda, par tsüraburi koba temoatsütem/ rongsentem bendena yutsü ajak Babilon nungeri bener ao. Chuba Hezekia asoshi asüküm mapa ka liasü. Atangji, Tsüngrem kanga jashi. Mapang tatsü ka tsüngda, par tsüraburi koba temoatsütem/ rongsentem bendena yutsü ajak Babilon nungeri bener ao. Chuba Hezekia asoshi iba tensaji tatembang asü. Aiben, Tsüngremi asenok nem mapang tajung alangzüktsü maongka agütsür, asenoki amadoker aser temenen nem kokdaksür. Tongtibangsa asenoki asen taküm nung kanga kümdanga mitaa alitsüba kaji, asüküm jakla ya lir, aiben asenok iba asüküm jakla nem kokdaksür aser iba asüküm ajanga asen taküm atsüngzuka aor. Tsüngremibo Chuba Hezekia nem takok ma nung takok agütsü, saka pai pa asüküm jakla mokoktetdang pa taküm aser par yimli ajak chirep. Asüküm jakla ya majung aser iba asüküm jakla ya lira, asenok intokdi.

## SARASADEM

Kibuba Yisu, kü dak koba asüküm jakla lir, iba temenen yimya ya azüoktsü ne tashi agüjangma. Amen

## CCP-i Khristantem dang Tracking App nung register asütsü tuyu

**March 10, 2023:** China Communist Party (CCP)-i Henan province nung

Khristantem densema yimsü balala amanger ajak dang online nung form fill up süa tekülem sentongtem nung adentsü atema temelaba meshitsü tuyuogo.

Tamangertemi Tenla kitem, mosques mesüra Buddhist tekülem kitemi onüra parnok "Smart Religion," ta ajaba app ajanga application agüja online reservations asütsüla. Iba app ya Henan province nung aliba Ethnic & Religious Affairs Commission-i yanglu, ta religious freedom watchdog- China Aid-i metetdaksü.

Osangbener den jembidang International Religious Freedom Summit Co-Chair, Sam Brownback-i, "Joko tangbo parnok (China Communist Party) nisungtem tenla kidangi aotsü atema-a phone nung register asütsü tuyu. Ibaji parnok tamangertem oli-ora ajak itdangitsü aser tekülem kitem shibangtsütsü atema lir," ta metetdaksü.

China Aid-i, "Application agütsürtem jagi pei nija osang metetdaksütsüla, iba nungji tenung, phone number, ID

number, pei talidak, mapa aser tasoba anogo densema lir," ta metetdaksü.

Tamangba yimsü balala amanger ajak mita azüoktsü nükjidong nung tang tesüsa Chinese Communist Party (CCP)-i iba app adoker.

2021 kum December ita nung China State Administration of Religious Affairs-i yimsü balala ajak ano taliba azüoktsü atema tetuyuba kar sangdonga liasü.

Online ajanga yimsü dak sendakba osangtsüsang prokba Chinese organization mesüra nija ajaki provincial religious affairs departments nem application agütsütsüla aser online ajanga tekülem sentong ayongzuka aginer Arogo den tanga teloktem aser colleges-i jelia Internet Religious Information Service Permit meshitsüla.

Tangbo China nung yimsü dak sendakba sentongtem Live broadcasts mesüra online recording nokdangogo. Yaküm March 1, 2022 nungi iba ya nokdanga liasü. Iba dak alia yimsü nung ajemdaker lokti mesüra nijai online ajanga senotsü lenmang bushiba nokdangogo.

**AO OSHI ANGAZÜKDAK:****TANÜ ANGAZÜKTSÜBA OJANG****Pela**

(v) temulung sangwasangwa aküm (happy)

\* Ni takok angudang kübu kanga **pela**.**Pelasesem**

(v) tepela lemsatep ( shared happiness)

\* Ozü kidanger tanur asoba tepela anogo nung onoka par den **pelasesem**.**OLONG PAITEP # 6452**

	1				2	3			
4			5						6
						7			
	8								
	9			10				11	
						12			13
14									
						15			

**TIPILEN**

2. Sü jeplok  
4. O agi merenshi  
7. Ayongküm li  
8. Chiyungtsü mapang süiadok  
9. Tsüngrem den jembiba  
12. Saklok  
14. Samaba mebushitet  
15. Mejanga onü  
16. Tzü shiruru ka

**LANGTSÜNGLEN**

1. \_ \_ \_ \_ i  
3. Kasa masü  
5. Nüchi masü  
6. Tashi endok  
9. Langtem  
10. Anü malidang  
11. \_ \_ \_ \_ \_ kibur  
13. Tebur tembar tsungda jatepba

**OLONG PAITEP # 6451 TELANGZÜBA****TIPILEN :**

1. Semtu, 3. Lepko, 5. Bilem,  
8. Ulu, 10. Tsüngpang,  
11. Tesangwa, 13. Aoksa,  
15. Putir, 16. Yipru.

**LANGTSÜNGLEN :**

1. Sayu, 2. Teb, 4. Kimong,  
6. Lungkak, 7. Milak, 9. Zünga,  
10. Temopu, 12. Walu, 14. Ali.

**NAGA LIMA NEM BENDANGERI TENNG JALOKTSÜBA**

**Sobangba** : Temba.... Asen Naga nunger nem bendangeri tenung tajung jaloktsüba "Land of Festival"... Iba tetezü ya kechi akaaa...???

**Alokba** : Ayeee...Temba ya tenung tajung masü ako.... Naga nungerji azümesen aser chidiyungdi... Benjong dang sapuba lima asü agi anemsu agi ajaba aja... Iba ya Kecha konang ama jembitsüba masü aakseta bilemtsüla.

**Sobangba** : Temba... Ao lima dang "Land of Pioneer"... Mezüngbur... Tamabur... Tanishir... lima ta ajaba ya-a koda....???

**Alokba** : Ayyee... Ao kinji yimkü-yimli nunga tamapur rakteper... Kin kidong jakzüka aruba nunga tambu rakteper... Ano shinga tanitaker mali ajunga tanishir dang... Ajak "Korangsemer" dang asüba agi jaloktsüba aja.

**Sobangba** : Temba...Surabang "Land of Fashion" ta jaloktsüba ya-a koda....???

**Alokba** : Eesssh...Temba ajisa tamajungba adi... Takar-Sensaker... Tular-Tilar mebendang... Pei kibong dak malangba subo-solemtsü sobur jaksa-jaklemtepba agi..."Jaksa-jaklem lima".... ta jaloktsüba ajaaa.

**Lilir- L.Kika Pongener.****Jorhat nung tanur ka tetsüng aibelena operation asü**

**Jorhat, March 10, 2023**  
**(Agencies):** Jorhat Medical College & Hospital (JMCH) nung tanur ka tetsüng aibelena operation asü.

Dergaon kübok Misamari nung alir arishi küm 9 tain tebur Kalpajyoti Das ya December 2022 nungi JMCH nung anepalua arur. Pa tetsüng achijilen timtem atema anepalua arur.

March 9, 2023 nü pa mozü kidang aniok aser orthopedic department nungi doctor temi operation asü. Ajisüaka operation asüba sülen tanubosanger kinungertem kanga aoksatep kechiyong Kalpajyoti tetsüng achiji masü

saka abelen nun gang operation agir liasü.

Kinungertemi doctor tem dang ashi aser iba sülen parnoki pa tanaben operation theatre-i anir irr achijilen operation asü.

Doctor temi parnok dang jelia mashi ta tanubosanger kinungertemi tai tongloksü. Kalpajyoti tetsüng anatsülen operation agitsüba süra kechiba pa operation theatre nungi anir adok ta parnokisa doctor tem dang asüngdang.

Osang junga meshitepba ajanga iba ya atalok aser bushisüngdang südar ta JMCH nung Medical Superintendent Dr. Purnima Barua-i ashi. "Tanubosang tetsüng abelen

nunga timtem tila ka adok aser iba jagi doctor temi inter-operative telemteba ka agia tetsüng abelen nung mezüng operation asü. Operation agiba doctor temi tamasa kinungertem dang tetsüng abelen nung operation asütsüba indang osang ashitsüba liasü" ta Dr. Barua-i ashi.

Iba tatalokba ajanga JMCH nung jungjunga anepalu masüba indang tebilemtsü khuret ka adokogo.

Tanubosanger kinungertemia iba tatalokba jungjunga bushisüngdang asütsü aser tarutsü nung ibala mesükba mataloktsü atema takhangba agütsüogo.

**Manipur police aser AR sepaitemi KCP telungpur ka apu**

**Imphal, March 10, 2023**  
**(Agencies):** Manipur police aser Assam Rifles külemi mita aodang Kangleipak Communist Party (URF) telungpur ka apu.

Telungpur ket nung prangpong ka, bomb ana aser mobile phone ka ngutetogo, ta police-i ashi.

Bishnupur district police commandos aser Assam Rifles sepaitemi Manipur University anasa ki ka mita aodang telungpurji apu, ta police ketdangsür kati ashi.

Manipur nung Yaoshang benjung amongba tiyalong nung telungpur kari tashiyim agi sen

sarutsü meranger ta osang angazükba sülen Bishnupur police commandos aser 16 Assam Rifles sepaitemi Matrikhong Awang Leikai nung ki ka mita ao.

Telungpurji Laishram Tiken (40) ta jangjaogo aser pa ya Ithai Wapokpi Mayai Leikai nungi lir ta police ketdangsüri ashi.

**GOVERNMENT OF NAGALAND****OFFICE OF THE DIRECTOR GENERAL OF POLICE,****NAGALAND :: KOHIMA.****NO.PHQ (D-II)CLO/2014(Pt)****Dated Kohima theth March 2023****NOTICE**

All unsuccessful Tender(S) for Supply of Clothing/Equipments Items for Nagaland Police, Nagaland Armed Police (NAP) and Indian Reserve Battalions (IRB) for the year 2021 - 2022 are hereby notified to collect your Clothing/Equipments Samples from Supply Branch PHQ within 30 (thirty) days from the date of issue of this notification.

Failing which the aforesaid Samples shall be disposed off without further notice.

**Sd/****(RUPIN SHARMA) IPS.****Director General of Police****Nagaland: Kohima.****GOVERNMENT OF NAGALAND****OFFICE OF THE LABOUR COMMISSIONER****NAGALAND : KOHIMA****New Capital Complex****No.LBR-305/91(Vol-I)****// Dated Kohima, the th March, 2023.****POST ADVERTISEMENT**

PRESIDING OFFICER LABOUR COURT, DIMAPUR: 1 POST (in the rank of Joint Director) ; in the Pay Band PB-3: Rs.15600-39100 with Grade Pay Rs.7600.

Minimum Qualification: A person shall not be qualified for appointment as the presiding officer unless:

- He/She is, or has been, a Judge of a High Court: or
- He/She has, for a period of not less than three years, been a District Judge or an Additional District Judge: or
- He/She has held any judicial office in India for not less than seven years: or
- He/She has been the Presiding Officer of a Labour Court constituted under any Provincial Act or State Act for not less than five years.
- He/She should be an independent person.
- He/She should not have completed 65 years of age as on 31st March 2023.

Applications are invited from individuals who qualify in any of the above listed qualifications from Sl.No. (a) to (d), and also qualify in Sl.No. (e) & (f). The application should contain detail resume supported by relevant documents including contact member, which may be submitted on or before 15th April, 2023 to the following address:

The Labour Commissioner  
Office of the Labour Commissioner  
Nagaland : Kohima  
New Capital Complex

**Sd/-****(Er. S. L. WATI AIER)****Labour Commissioner****Nagaland, Kohima.**

## Ram Chandra-i Nepal PM inyaktsü 17 ben meranger tir aküm

**Kathmandu, Metsüremi/ March 10 (Agencies):** Nepali Congress nungi lenir tejen Ram Chandra Poudel ya Nepal indang tir tasembuba ama shimogo. Paudel ya tang yimsü tesüdak party 8 alliance-i busem aser pai CPN-UML lenir Subash Chandra Nembang madak takok ngua tir shima liasü.

Brehostibarnü agiba tir election nung Poudel-i vote 33,802 angu aser pa den toktepsang Nembang-i vote 15,518 angu. Nepal nung tir election nung federal parliamentarian aser provincial assembly züngsem temia vote agütsütsü mela lir.

Federal parliamentarian züngsem 313 aser provincial assembly züngsem 518 ajanga Nepal sorkar nung tekolakba shimtsü asoshi vote agüja liasü. Federal parliamentarian indang vote share ya 79 aser state assembly züngsem indang 48 liasü.

Tang tir menden nungi alutsü aliba Bidyadevi Bhandari indang kümsük ya March 12 nung tembanger.

November 4 nü agiba general election nung Ato Kilonser Pushpa Kamal Dahal (Prachanda ta ajar) lenisüba kübok aliba Maoist centre ya jenjang tasembuba nung liasü. Election matongdang Dahal-i election sülen ato kilonser mapa asoshi nungitsü ta Nepali Congress-i aniba coalition den tezüngzüktep ka yanglua liasü.

Ajisüaka election osang sangdongba sülen Nepali Congress tir Sher Bahadur Deuba-i pa ato kilonser kumdaktsütsü memolung aser mezüng küm 2.5 ya pa inyaktsü tim, ta shia liasü.

Dahal-i aji memolung aser opposition party CPN-UML



Ram Chandra Poudel

mendenpuba, KP Sharma Oli'er ki atong. Oli teyari nung pa ato kilonser akum. Ajisüaka Parliament nung January 10 nü vote of confidence agitepdang Nepali Congress-i Dahal bukuma liasü.

Iba mapang tang tir inyaktsü shima alisang Congress lenir Ram Chandra Poudel-i Nepali Congress-i ajangzüka aliba ajak akoksaogo ta shia liasü. Ajisüaka ita ana tsüngta Nepali Congress ajanga maneni Nepal yimtenren par leni meyipdaksü.

Nepali Congress ajanga PM Pushpa Kamal Dahal nem vote of confidence agütsüba sülen tir asoshi pai national consensus benoka liasü. Saka CPN-UML tir KP Sharma Oli-i memolung. Iba yongji Pushpa Kamal Dahal-i CPN-UML den alliance toktsü aser opposition party Nepali Congress indang candidate yaria liasü.

Tir election mapang ato kilonser ya Congress den alliance liasü aser iba mapang Ram Chandra Poudel ya Republic of Nepal nung tir tasembuba akum. Pai ashiba ama Nepali Congress akoksaba sülen pa tir akumtsü maongka angu.

Nepal tir inyaker rongnung Paudel ya tambosang lir. Paudel ya 1944 küm October 14 nü aso

aser King Mahendra-i Congress lenir BP Koirala tepuokdak ayuba sülen pa arishi küm 16 nung politics nung tetsüing ajemok.

Koirala ya India nung jenoka lir 1976 küm meyiba shilangba sülen Paudel ya pa den tesendaktep tajung nung ali. 1961 küm Nepali Congress-i sorkar anema longkak aitba nung Paudel-ia shilem agia liasü. 1962 küm independent students movement ka nung Poudel ya activist ka liasü aser Saraswati Campus, Kathmandu nung student union tir ka ama 1963 küm shima liasü.

1992 küm Paudel ya Minister of Local Development and Agriculture akum aser 1994 küm pa ya House indang Speaker shim. 2000 küm pa MP ka ama asemen buba shim aser Deputy Prime Minister aser Minister of Home Affairs and Communications akum.

Chuba yimli anema raraba mapang Paudel ya tepuokdak küm 13 ali aser ato kilonser atema election agiba nung pa 17 ben tamakok ajurua liasü.

2010 küm Congress nungi Paudel, Maoist nungi Prachanda aser CPN-UML nungi Jhahnath Khanal nungertem prime ministerial election nung candidate liasü. Ajisüaka constitution ajanga candidate aseme vote peria mongutet anungji iba election 7 ben agia liasü.

Iba election tiben buba agidang Prachanda-i pasasa ato kilonser menden asoshi toktepba nungi anen aser Paudel-i Khanal den 17 ben toktep. Iba mapang result kata mongutet nung, election ozüing melenshi aser iba sülen agiba election nung Jhahnath Khanal ya ato kilonser inyaktsü shima liasü.

## Israel sepaitemi Palestine nunger asem khaset

**Ramallah, Metsüremi/ March 10 (Agencies):** Occupied West Bank north tsütsü Jenin yimti nung Israel sepaitemi tesem kar mita aoba mapang Palestine nunger nisung asem tepset aser ibai kasa yimti nung tesem ka mita aodang nisung trok tepseter ghonda 48 sülen ataloker.

Palestinian Ministry of Health ajanga ashiba agi, Brehostibarnep nisung asem khasetba ya arishi küm 22 tain Ahmad Fashafsheh, arishi küm 26 tain Sufian Fakhouri aser arishi küm 25 tain Nayef Malaysheh ta jangiatetogo.

Mongulbarnü Israel mitkar temi akhaba zübo agi ano arishi küm 14 taon Walid Nassar-a Brehostibarnü asü, ta health ministry ajanga ashi.

Fashafsheh, Fakhouri aser Malaysheh nunger ya Jenin south tsütsü Jaba yimtsüng nung gari ka telung nung lia khaset aser ibai temerenshi agütsüba ka lir ta Palestinian nungeri ashir.

Civilian ama undercover units densema Israel special forces temi Jaba ya anepdang 6:00 ako nung mita ao.

Iba mapang Palestinian fighter aser Israel sepaitem tsüngta khatap, ta yangji aliba osang ajanga ashir.

Israel ketdangsür temi sangdong ka nung ashiba agi, iba operation nung border police, army aser itdangiter tem densema liasü aser Israel army dak tenük yoker shooting operation kar aliba nung shilem agirtem aputsü nükjidong nung iba operation ya agi.

"Operation mapang onoki bushirtem indang gari nungi Israel sepaitemi dak injang khaloktsü, aser iba sülen onokia telangzüba agüja prangbong bena alir asem tepset, shirnok gari nung liasü." ta sangdong ajanga ashi.

Iba mapang tepseter Palestine nunger nisung asem ya Palestinian Islamic Jihad den sendaktepa aliba Jaba Brigades nungi liasü, ta osangbener kati ashi.

Osangbener temi noksa sayuba nung gari ka kanga sashia raksar, kilem nepsar aser window jaksar liasü.

Israel sepaitemi gari nung 'point-blank range' nungi injang

khaloktsü aser army temi ki ka lungbanga yangji alir tebur ka apu, ta Jaba nung Fatah party indang secretary Jawad Khalilieh-i osangbener dang ashi.

Palestinian Authority-ia iba tatalokba aija liasü.

"Parnok (Israel nunger) ya tenük tapok sepaitemi lir aser ozü nüburtem tanen makai tim atema nokdakba anendaktsütsü meranga kiralongra mapa inyaker, saka onoki manentsü," ta Palestinian Authority indang odongtar Ibrahim Melhem-i ashi.

Mongulbarnü Israel sepaitemi Jenin refugee camp mita aoba mapang nisung trok tepset aser 26 yirutsü.

Iba anema West Bank tesem ajungalen Bodhbarnü nüburtemi longkak aita liasü.

Israel sepaitemi aser West Bank nung aliba Israel nunger temi 2023 küm tenzüker Palestine nunger 78 tepsetogo aser item rongnung tanur 14 aser tetsür ka densema lir.

Kasa mapang Palestine nungeri lendong agütsüba nunga Israel nunger 14 aser Ukraine nunger ka tepsetogo.

## SÜR KÜM KA AJUNGBA ANOGO MENUNGRA BILEMTETER



Lt. Mr. Mapunungang Sempo (Chuchuyimpang) ASO- 13.02.1952. - ASÜ- 11.03.2022.

Temeiem Oba, nai onok rongjenseta aser temulung raksa yutsür na teti asoshi anisüngzükdak limai aoba, tanü pungmang amai küm ka abensaba anogo nung onoki na menungraseta sarasadema amonger.

Oba, tanü na onok den meliaka nü menürem jak tenur mapang aben na ajemalu shisatsü tajung agi onok den lemsatapa aruba onoki teti belemteter. Oba nabo teti tepela dak asen teyanglur Kibuba den alitsü ta amanga, onok temulung anisüngzüker.

~Temeim Kinüngtsü, Chirnur, Semchirtem aser Anükapang.

## Taoba Malaysia ato kilonser Muhyiddin Yassin puogo



Muhyiddin Yassin (File photo)

**Kuala Lumpur, Metsüremi/ March 10 (Agencies):** COVID-19 mechi linük nung lock down benokba mapang Malaysia ato kilonser inyaka alisang Muhyiddin Yassin puogo aser ochimashi mapa inyakba ken o jembitsü asoshi okadaki anir arutsü, ta linük indang anti-graft agency ajanga ashi.

Malaysian Anti-Corruption Commission (MACC) ajanga Brehostibar nikongdang sangdong ka nung ashiba agi, par sorkari economic recovery project ya tenzüka atema asüngdangyaba sülen Muhyiddin ya apu.

Arishi küm 75 tain Muhyiddin ya pa sasa Brehostibarnep MACC asüngdangyaba nung arua aden aser ibai pandemic mapang contract melen par Bersatu party indang account nung contractor temi sen inoktsüba ken o lir.

Taoba ato kilonser ya okadak Hokulbarnü nokdaktsü, ta MACC tekolakba Azam Baki-i state news agency Bernama dang anepdang shia liasü.

Muhyiddin ya MACC office-i maodang pa busemer temi lungbanger sarasadema aliba noksa nguogo, aser pai tai tongloksüba magizük aser ibai yimtenren tsütsü nungi tenük yokba ka lir ta ashir.

Iba ken o nung ano Bersatu

politician aika dang asüngdangyaba süogo aser ana anema ken o benoka lir.

Office yutsüba sülen ken o benokba linük lenirtem rongnung Muhyiddin ya nisung tanabuba alitsü. Taoba ato kilonser Majib Razak ya 2018 general election nung tamakok ajuruba sülen ochimashi ken o aika pa anema benoka liasü. Pa ya küm 12 tepuokdak ayutsü obendang agütsü aser 2022 küm August ita nungi tepuokdak alir.

Muhyiddin ya 2020 küm March ita ato kilonser akum aser 2018 küm otsü yanglua election akokba reformist coalition nung mapang kabo pa liasü.

Yimtenren tsütsü mangatetep tali adoka 2021 küm pa ato kilonser nungi anen aser par coalition-i November ita election nung toktepba nung ano yimten yimsüsür tejen Anwar Ibrahim-i tsükdaktsü.

Anwar-i ochimashi anema nokdaktsü nangzüka pandemic mapang sorkari teyari balala agütsübatem lepa repringshitsü ozüing agütsü.

Mapang ka Muhyiddin lenir aser Anwar den külem tenzüker Najib Razak ya sen dollar billion aika jenjang state func 1MDB ken o nung aibelena aliba nguteta Malaysian ato kilonser tepuokdaki yoker mezüngbuba akum.\

## Indian Wells: Andy Murray aser Emma Raducanu teimla mesamai lir



Andy Murray & Emma Raducanu

**California, Metsüremi/ March 10 (Agencies):** Taoba mapang world number 1 nung alisang tennis asayar Andy Murray-i Indian Wells WTA aser ATP Masters 1000 Brehostibarnü Tomas Etcheverry den kanga meranga asaya set ka nung tamakok ajuruaka round tanabuba tongogo.

Britain nung Murray-i Argentina nung Etcheverry madak 6-7 (5/7), 6-1, 6-4 agi takok angutsü asoshi ghonda asem ser minute 12 asaya liasü.

"Taküm ni asayaba match karbo ni akoktsü khenyongi malang," ta Murray-i ashi, shibai Australian Open nung ghonda pongu dak tema asayar five-setter akok aser taoba ita Doha nung match pezü asayaba nung match points ti tashi alemteta asayar final nung Daniil Medvedev-i tsükdaktsü.

2019 küm hip replacement surgery agir alisang Murray-i Brehostibarnü asaya nung set tasembuba indang game ti buba nung break points ana tashi soita yutet.

Asaya tenzüker ghonda asem ser minute toku buba nung Murray asoshi match point liasü, saka pai iba maongka magitet aser minute asem lir pai ace ka ngua iba asaya nung takok angu.

Pai seed 15 buba nung

alisang Spain nung Pablo Carreno Busta den taruba match asayatsü.

Yiruba ajanga pa wadang amokmerena aruba sülen Grand Slam title asemen aser Olympic gold medal ana ngua alisang Murray-i pa wadang tatemlen jangratema asayaner ta shia liasü.

"Ni asayatsü küm ishika anünga aliba nung jangratema asayaner. Ni maneni asayaner aser ajungmesor ama bilemer," ta pai ashi.

Britain nung 2021 US Open asayamung akokla Emma Raducanu-ia set anaprong nung break down nungi tajungba asayatena Danka Kovinic madak 6-2, 6-3 agi takok ngua 2022 Australian Open round tanabuba nung la tsükdaktsüma tayang kepzüko.

"Ni junga asayatba atema pelar," ta Raducanu-i ashi, shiba teka nung timtem aliba ajanga 2022 season tetenzüklen nungi asaya anen aser 2023 küm Auckland nung match tanabuba asayadang takettsü yirua liasü.

La ya tonsillitis mechi taoba hopta Austin nung WTA asayamung nung shime magitettsüsa akum aser teka nung timtem aliba ajanga California nung pre-tournament exhibition ka nung shilem magitettsüsa akum.

## T20 nung Bangladesh-i world champion England aoksatsü

**Chattogram, Metsüremi/ March 10 (Agencies):** Bangladesh-i England madak wicket trok agi takok ngua Bangladesh south tsütsü tzükum anasa aliba Chattogram yimti nung Twenty20 international cricket asaya mezüngbuba nung world champion aoksatsü.

Najmul Hossain Shanto-i half-century aser captain Shakib Al Hasan-i ball 24 nungi runs 34 yanglua par teloki England madak T20 international mezüngbuba takok Brehostibarnü nguteta liasü.

Mezüng batting asüba mapang opener Jos Buttler (67) aser Phil Salt na senteper runs 80 yangludang England-i iba asaya azüoka ali ama liasü, saka Salt ya runs 38 ngur out

asüba sülen Buttler yarir kangabo meliasü aser over 20 atemdang parnoki runs 156 yangluteta nisung trok out sür liasü.

Iba asaya nung Bangladesh asoshi Hasan Mahmud ya bowler tajungtiba liasü, shibai wicket ana agi aser külem team nungi ano par pezüi wicket ka-ka agia liasü.

Bangladesh nung batting nung Litton Das aser Rony Talukdar nati tenzüka mapang tatsüka mena liasü aser Shanti (51) aser tang mezüng asayar Towhid Hridoy nati runs 65 yangluteta Bangladesh asaya nung teimla agütsü saka tena ya over ana nung atongtepa out asüba sülen tera temolung ajema akum.

Hopta tetenzüklen

Ajisüaka item timtem ajanga la temolungtetba tali kadaktsür ta lai ashi.

Ano asaya dang aka nung asemen tashi Grand Slam takok ngua alisang Stan Wawrinka-i Australia nung Aleksandar Vukic madak 6-4, 1-6, 6-1 agi takok ngua liasü. Wawrinka ya temokok nung surgery ana aser tetsüng nunga surgery ana agia lir.

2020 US Open akoksang Austria nung Dominic Thiem, shiba 2021 küm teka achichi yiruba sülen ita ti tashi asayamung ka nunga shilem magiteti aru, pai aonung asaya nung France nung Adrian Mannarino den asayatsü aser 2017 US Open champion Sloane Stephens-i 2020 Australian Open akoksang Sofia Kenin den asayatsü.

Brehostibarnü danga sayatem nung Australia nung Thanasi Kokkinakis-i US nung Brandon Holt madak 6-4, 6-1 agi takok anguba sülen top-seeded Carlos Alcaraz den round tanabuba nung asayatsü.

America nung Ben Shelton-i Italy nung asayar tejen Fabio Fognini madak 6-4, 6-1 agi takok ngua seed pezü buba nung alidang defending champion Taylor Fritz den asayatsü.

## Europa League: Manchester United-i Real Betis akok

**Manchester, Metsüremi/ March 10 (Agencies):** Liverpool-i otsüsüa akokba nungi shia arua Manchester United-i Europa League last 16 tie indang leg mezüngbuba Brehostibar aonung asayadang Real Betis madak 4-1 agi takok angu aser Sporting Lisbon away nung 2-2 draw asüba ajanga Arsenal pur quarter-finals atongtsü asoshi mapa inyaksü agütsür.

1931 sülen tesashitiba aser tamajungtiba tamakok United-i ajurubaji Deobarnü Anfield nung 7-0 agi tamakok anguba ya liasü. Brehostibar aonung asaya nunga Erik ten Hag-i asaya tenzükdang kasa asayatem yok aser sempeta liasü.

"Tamakok ajuruba sülen team-i telangzüba agütsüba nai angur. Iba season nung ibai mezüngbuba masü, ponguben mesüra trokben asendenshir meyipa shilangba nai ngur alits. Iba team nung yimya kar lir, anungji parnok nem tentügang agütsür," ta Ten Hag-i ashi.

Asaya tenzüker minute ishika tsüngta Marcus Rashford-i iba season asoshi goal 26 buba agütsü, saka Betis nungi Ayoze Perez-i iba goal kepzüka kasa akum.

Tawa kanga sashia aitsür asayar tajug anati Real Betis den asayadang kanga junga asayateta liasü.

Antony-i goal post kinük leni goal ka agütsüba sülen Ten Hag-i ano captain shimsang Bruno Fernandes-i Luke Shaw indang corner nung goal ka tekolak agi tonglokja liasü.

"Tanü Bruno-i kanga junga asayaago. Asaya tenzükdang nungi pai kanga junga ania goal-ka agütsü, anungji ni pelar," ta Ten Hag-i ashi.

Iba sülen Wout Weghorst-i United asoshi 15 ben buba asaya nung goal tanabuba agüja liasü.

Asaya danga ka nung Premier League nung temaba jenjang nung aliba telok, Arsenal ya Portugal yimtiba nung draw dang südaktsü.

Küm 19 nung league title mezüngbuba angutsü teimla liaka

Mikel Arteta-i asayar tajug ajak tetenzük nungi asayadaktüsü aser William Saliba-i mezüng goal tekolak agi tonglokja liasü.

Saka mapang tatsüka tsüngta Sporting nungi Goncalo Inacio-i kasa yimya nung Marcus Edwards-i corner metsüba nung tonglokja liasü.

Sporting ajanga goal tanabuba agütsüba nung taoba mapang Tottenham midfielder Edwards-i shilem tajung agia liasü.

Ajisüaka Granit Xhaka-i cross yokba nung tia maka Hidemasa Morita dak tsükdaker par goal telongi ball longoka ai aser Arsenal kasa jenjangi atu.

"Away nung asayadang goal ana chir draw nung tembangba nungi nai tajung agitsüla," ta Arsenal boss Arteta-i ashi.

"Saka asenoki parnok nem teimla tali agütsü."

Ano asaya danga ka nung form nung alisang Angel di Maria-i goal ka agütsüteta Freiburg madak 1-0 agi akokba sülen taruba hopta Juventus tera agi temaba jenjang nung Germany nung asayatsü.

Jose Mourinho'er Roma ya last eight tongtettsü teimla nung lir, kechiaser Stadio Olimpico nung par telok nungi Stephan El Shaarawy aser Marash Kumbulla nati goal ka-ka agüja Real Sociedad madak 2-0 agi akok.

Trokben tashi iba asayamung takok ngua aliba telok, Sevilla ya La Liga nung relegation masütsü meranga asaya saka Europa League nung teti tetsübotsü telok ka lir aser parnoki Fenerbahce madak mezüng leg nung 2-0 agi takok ngur taruba hopta Istanbul nung asayatsü. Sevilla asoshi Joan Jordan aser Erik Lamela nati goal ka-ka agütsü.

Ano asaya danga ka nung Bundesliga nungi mamangteti arur Union Berlin aser Union Saint-Gilloise tsüngta asaya 3-3 nung tembang.

Bayer Leverkusen-i home nung Ferencvaros madak 2-0 agi takok angu aser Shakhtar Donetsk o Feyenoord na 1-1 draw nung tembang.

## Firmino-i Liverpool yutsütsü lemtetba atema tera aoksar: Klopp

**Liverpool, Metsüremi/March 10 (Agencies):** Roberto Firmino-i season tatem Anfield yutsütsü telemtetba agiba atema aoksar, ta Liverpool boss Jurgen Klopp-i ashi.

Brazil nung forward nung asayasang indang contract June ita tembangba sülen pa Anfield nung küm ti tashi aliba tatem kati arutsü.

Arishi küm 31 tain Firmino ya contract tasen asoshi jembia aru, saka pai iba club yutsütsü molungtet.

"Aoksa? Hao, tera aoksa - lenmang ana liasü aser kati ao. Aser ni aji kanga akumtsübor," ta Klopp-i Hokulbarnü ashi.

"Saka iba ama mapang talangka tesendaktep nug iba amala ataloktsü ya asensa masü."

World Cup atongtsü lia anisüngzük masüadang Premier League asaya 13 nung Firmino-

i goal tenet agüja liasü saka temola yirua ita ana tashi masayateti aru.

February ita Everton madak takok anguba asaya nung pa meyipa shilanga asaya, saka January ita anioksang Cody Gakpo ang timba Darwin Nunez aser Mohamed Salah nung den külemi asaya arur.

Ajisüaka Deobarnü Manchester United madak goal 7-0 agi akokba nung paia Liverpool asoshi goal tatembangba agüja liasü, koba Reds asoshi 354 ben asaya nung goal 108 buba liasü.

Anfield nung Firmino aliba mapang Liverpool-i Champions League, Premier League, FA Cup, EFL Cup aser Club World Cup nung takok ngua lir aser May 20 nü Aston Villa den asayaba ya Liverpool asoshi home game tatembangba asütsü.

## BILEMDANGANG

"Tatok agütsütetba ajanga temulung sangwadaktsür."